



**Cusseglie
naziunal Sep
Cathomas ha
batti per mintga
vusch a favur da
la Convenziun
da las Alps.**

KEYSTONE

Refusa da realisar la convenziun da las Alps

La decisiun dal cussegl naziunal n'è betg l'ultim pled

■ (anr/vi) Il cussegl naziunal na vul betg realisar la convenziun da las Alps. Ils burgais han fatg frunt als protocols che descrivan co ch'i saja da metter enturn la convenziun. Sep Cathomas (pcd/GR) ha batti il venderdi passà fin l'ultim mument per mintga vusch. «Nus avain batti sco liuns», di Cathomas a l'anr. Cun nus manegia el l'ala sanestra ensemen cun ina maiortad da la pcd e la pbd. Ma la pld e la pps han refusà cun 97 cunter 94 vuschs d'entrar sin la fatschenta. Uschia sto il cussegl dals chantuns s'occupar per la segunda giada da la chaussa. Lez aveva lubì il 2004 trais da nov protocols: il protocol da traffic, il protocol da protecciun da terren e quel da planisaziun dal territori ensemen cun svilup durabel.

Cathomas spera che la chombra pitschna restia tar sia posiziun d'avant tshintg onns. Lura

turnass la fatschenta ina segunda giada en il cussegl naziunal. «Forza pudess ins lura tractar a maniera pli profunda la materia en la fracziun», di Cathomas che spera sin quella via da gudagnar las vuschs necessarias.

Ils tuns critics

La protecciun da las Alps stettia memia fitg en il center, ha ditg Toni Brunner (pps/SG) il venderdi passà en il cussegl naziunal. La convenziun possia bain servir sco agid d'orientaziun, ma la strategia da la Svizra da sviluppar il territori alpin stoppia avoir prioritad.

Ils burgais han era criticà la procedura dad accumodar cuntraversas. La Svizra fiss en ils mauns d'ina dretgira da cumpromiss. I na dess nagina pussaivladad da recurrer cunter las decisiuns da questa dretgira.

La Svizra en l'isolaziun

La convenziun da las Alps n'impedeschia betg il svilup economic, ha ditg Ursula Wyss (ps/BE). En l'Austria sajan l'agricultura ed il turissem creschids gist pervi da la convenziun da las Alps.

Nagins dals pajais che hajan realisà la convenziun pateschian da dischavantatgs, ha ditg il minister d'ambient Moritz Leuenberger. Senza success ha el avertì che la Svizra sa manavreschia vivanant en l'isolaziun, sch'il cussegl naziunal n'entria betg sin la fatschenta.

La convenziun da las Alps è ina cunvegna tranter otg stadis alpines e la UE. La Svizra ha ratifitgà la cunvegna da rama il 1999. Uss è la Svizra l'ultim pajais che n'ha anc sutscrit nagins protocols che preciseschian la cunvegna.